



Mehanizam za međunarodne krivične sudove (MMKS ili Mehanizam) osnovao je Savjet bezbjednosti Ujedinjenih nacija 22. decembra 2010. da nastavi nadležnosti, prava, obaveze i ključne funkcije Međunarodnog krivičnog suda za Ruandu (MKSJR) i Međunarodnog krivičnog suda za bivšu Jugoslaviju (MKSJ) nakon okončanja njihovih mandata. MMKS ima dva ogranka, jedan u Arushi, Tanzanija, i drugi u Haagu, Nizozemska.

IZJAVA

TUŽILAC

(isključivo za medije. Nije zvaničan dokument)

Arusha, 25. novembar 2016.

Ceremonija zvaničnog otvaranja novog objekta ogranka MMKS-a u Arushi Serge Brammertz, glavni tužilac Mehanizam za međunarodne krivične sudove UN-a 25. novembar 2016.

Potpredsjednice, ministri, ekscelencije, dame i gospodo, drage kolege,

Drago mi je što vam se mogu pridružiti danas na zvaničnom otvaranju novog objekta MMKS-a.

Tokom protekle dvije decenije, MKSR, Ruanda i međunarodna zajednica su, radeći zajedno, napravili važne korake ka pravdi.

Genocid počinjen u Ruandi jedan je od najtragičnijih događaja u savremenoj istoriji, i MKSR je pozvao na odgovornost mnoge visoko pozicionirane vojne i političke zvaničnike koji snose najveću odgovornost za njega.

MMKS i danas nastavlja s tim radom. Tužilaštvo Mehanizma je odlučno da preduzme sve napore na lociranju, hapšenju i izvođenju pred sud preostalih osam bjegunaca. Trojici bjegunaca će se suditi pred MMKS-om, a petorici pred nacionalnim sudovima u Ruandi.

Poduzimamo značajne korake kako bismo ojačali našu potragu za ovim bjeguncima. Tužilaštvo MMKS-a je produbilo saradnju s Interpolom i Afričkim udruženjem tužilaca. Takođe smo naš tim za praćenje ojačali osobljem s posebnim kvalifikacijama.

Pošto je to ono što je žrtvama potrebno i što one zaslužuju, želimo da se bjeguncima sudi u ovoj sudnici u ne tako dalekoj budućnosti. U Ruandi i bivšoj Jugoslaviji, žrtve dijele iste želje: da one koji su odgovorni za zločine vide pred licem pravde i da saznaju sudbinu svojih voljenih.

Vlasti Ruande takođe samostalno tragaju za više od 500 bjegunaca. Tužilaštvo MMKS-a će nastaviti da podržava njihove napore kako bi se obezbijedila veća pravda.

Omogućavanjem pristupa našoj zbirci dokaza i stručnim znanjima, mi takođe podržavamo krivično gonjenje za genocid u Ruandi pred sudovima širom svijeta.

U isto vrijeme, otvaranje novog objekta MMKS-a ovdje u Asrushu, afričkom gradu pravde, važna je prilika da se promiče i podrži pozivanje na odgovornost za međunarodne zločine na širem osnovu.

S iskustvom dugim dva desetljeća, sada znamo da je pravda najefikasnija kada se donosi bliže pogođenim zajednicama. Danas, nacionalna pravosuđa širom svijeta igraju sve važniju ulogu u pozivanju na odgovornost za međunarodne zločine. U trenutku kada je međunarodna pravda tema mnogih razgovora, jedan od ključnih pomaka koji se moraju napraviti jeste da se ojačaju nacionalni kapaciteti.

Tužilaštvo MMKS-a već radi na pružanju podrške našim partnerima u Africi u njihovoj borbi za pravdu. Kao samo jedan primjer, ovog ljeta smo u Najrobiju organizovali šestodnevnu naprednu obuku s fokusom na krivičnom gonjenju zločina seksualnog nasilja u sukobu. Obuku je pohađalo 30 tužilaca i drugih pravnika iz Kenije, Ruande, Južnog Sudana, Tanzanije i Ugande.

Planiramo da sličnu obuku održimo sljedeće godine u Kigaliju i nastavimo da prenosimo međunarodna iskustva i time pomažemo krivična gonjenja na nacionalnom nivou.

Ovaj novi objekat, stoga, može biti mjesto izgradnje kapaciteta i istraživanja. Domaći tužioci mogu se ovdje sastajati sa svojim međunarodnim kolegama kako bi razmjenjivali iskustva i naučene lekcije. Studenti iz cijele Afrike mogu doći ovdje do nauče više o međunarodnom pravu i borbi protiv nekažnjivosti.

U konačnici, ovo treba biti mjesto obrazovanja. Ono što sam naučio u svojoj karijeri na mjestu međunarodnog tužioca jeste da obrazovanje ima presudnu ulogu u promicanju pomirenja i sprečavanju budućih zločina.

Ono što je utvrđeno u sudnicama mora se izučavati u učionicama. Moramo učiti buduće generacije o opasnostima genocidne ideologije kako oni ne bi morali patiti kao što je patila Ruanda. Osim toga, moraju znati istinu kako bi mogli čvrsto odbaciti negiranje genocida uvijek i svuda.

Kao tužioci, imamo zadatak da rasvijetlimo ono što je skriveno i utvrdimo činjenice na osnovu dokaza koje smo prikupili. Nadam se da će taj rad, iako ne savršen, doprinijeti pomirenju i mirnijoj budućnosti.

U zaključku, Tužilaštvo MMKS-a je u potpunosti predano okončanju preostalog rada što je ekspeditivnije moguće. Zajedničkim radom možemo obezbijediti da se pozivanje na odgovornost nastavi ne samo u Haagu i Arushi, već i na nacionalnim sudovima u Africi i širom svijeta.

Veoma se radujem saradnji sa svima vama na ostvarenju zajedničkih ciljeva.

Hvala.

###